

懷遠縣志卷之三

賜同進士出身安徽鳳陽府懷遠縣知縣孫讓修

學校志

儒學舊在縣治東南半里元季燬于兵明洪武三年知縣唐蔚卽故址建學舍正統天順間相繼修葺

明正統四年禮部左侍郎陳璉重修文廟記畧曰邑學遭元季兵燹荒廢殊甚國朝洪武三年詔天下郡邑建學立師教養人材以資任用而前翰林學士括蒼王公景彰來爲教諭於是率諸生薙荆棘畚瓦礫卽故址創建學舍至六十年始行丁祭廟學漸加修飾山西黨君質由國子生來爲邑宰首與同寅各捐已俸以倡邑之賢士大夫來助恐後遂鳩工庀材殿廡講堂齋

懷遠縣志

卷三

學校志

一

舍廚庫諸所皆新之垣墉旣固内外有截肇工於正統四年九月訖工於六年七月旣完且美規模宏遠矣七年正月都察院右副都御史周公銓奉旨歸行焚黃禮先詣孔殿拜謁觀廟學完美嘉邑宰諸人之功屬文以紀其實俾後人相與護持不致廢墜予惟我朝崇儒重學蓋欲化民成俗思得賢才而肄業於此者必思聖人所謂教者何事馴至成德達才出爲國家用建功立名圖垂不朽庶幾有以副邑宰作興之功也

碑無存文  
見舊志

天順五年教諭黃叔高重修廟學記畧曰儒學在縣治東南元末兵廢洪武三年知縣唐蔚永樂元年知縣喻文偉胡秉彝黨質皆能出力成美天順四年夏復圯于水知縣李君壽適來是邑合謀邑丞謝君清劉君剛王君潭典史楊君諒訓導畢君理

韓君輔等各抽已資以倡邑之賢士題注奉施首塑聖賢遺像次及廟堂兩廡又次及齋舍廚庫可新者新之未創者創之改修文昌殿易樹牌樓所繕就完李君字鶴齡甯昌人胄監發身然于學尤拳拳焉

碑在學

成化十七年淮河漲學圯乃移建縣治東南一里荆山之麓正德七年提學御史黃如金復移建今學卽舊大聖寺基也

嘉靖元年邑人姚鳳儒學遷修記畧曰懷遠學宮自國初來遷者屢矣地勢於今爲得主之者侍御莆田黃公如金也相繼而修葺之則縣令高要李公豫輩也嘉靖改元春二月今令涿鹿徐公玠來令茲土下車謁廟卽集寮宥而諭之曰殿廡以崇聖賢堂齋以覃教化而文獻之徵修藏之所出入往來之門與路

懷遠縣志

卷三

學校志

一一

是固不可緩者於是考卜維時旣備乃事十越月而告成功焉殿十六楹則仍舊制像設器陳一一合禮外兩廡各五間各臣祠戟門櫺星門若神路則闢之民居昔無而今有也後則堂五間兩齋凡六尊經閣三號新二十間舊八間官舍三所儀門三間學門一座而閣與新號之經營亦闢之民間隙地也於是環門牆而觀聽者僉曰公之興學也如此而衆務有不克舉者耶公之能養士也如此而顧不能養我民耶事關風化信非俗吏所能爲徐公蓋先有所養故學校一興而士與民咸得其養矣爰紀其歲月以告世之採民風者嘉靖二年三月

碑在學

嗣是嘉靖二十三年二十八年四十五年萬曆四十七年屢經修

葺

嘉靖二十三年邑人楊時秀重修儒學記畧曰懷遠學聿自我  
皇明葢再遷矣茲則由荆山之麓闢梵宇而來也維時督學侍  
御黃君如金實主其事然方經厥始規制弗宏藻實弗備其以  
責之後人矣乎乃相繼令是者率視仕爲傳舍而視學爲末務  
間或少加之意亦惟補葺之僅不至傾圮而已余自髫游泮恆  
與同志者歎之夫里閭細民延一塾師亦必擇乃靜宇華乃軒  
寮而後子弟得肆志佔畢以慰所期待矧吾夫子固萬世之師  
表乎歲甲辰冬余方司農南畿邑庠博士梅君和鼎樊君鼎王  
君應士偕庠生施爲陸垠輩撰書辭走使於余云邑新侯聿來  
夫子之宮墻爲之煥然蓋學宮之前紆迴阻塞弗稱神道至是  
始審曲面勢以拓之由是而門而廡而殿而堂而齋而號而樓

而閣而祠宇而亭舍而藩垣咸撤舊而新之丹雘塗墍觀者竦  
然是役也爲日無幾而供力者靡知勞司計者靡知費區畫審  
而綜理精工用匪繼則時捐已俸以續之於茲崇師於茲比士  
仰瞻樂育厥功懋矣可不垂之貞珉以昭將來余聞而豁然自  
顧庸淺文惡足紀然余素所歎者而今始慰又何能無言哉葢  
學校之廢興也關乎一方之氣運茲學自告遷以來今始可觀  
則夫今日修飭之志卽先時謀遷之志也吾邑文運其將爲之  
新也夫昔周王作人多豐鎬之舊思皇多士王國克生我皇祖  
龍飛是邦一時圖麒麟銘帶礪者有矣嗣是則輔佐太平竭忠  
盡節爲昭代之名臣者亦有矣今之山立川迴猶昔日之鍾靈  
毓秀也聖皇御宇懋昭大猷又值賢有司敷申而振興之爲吾

徒者疇容弗自勵也侯秋君名逢慶字惟善河南汝陽人早以  
蜚英高第爲政廉明敏惠俱有嘉績故能竟是役云

碑在學

又邑人唐甯記畧曰嘉靖二十有三年汝陽秋君逢慶奉簡命  
令懷遠下車後修政立教百廢俱興始謁廟行禮慨然以興學  
爲心授以規畫於凡可因者仍之可革者易之可建者興之修  
而未備者緝之備而未飭者大之衆役競勸羣工展力不彌月  
而厥功告成焉曰殿曰廡曰堂曰門黝堊丹漆歸如煥如曰齋  
舍曰廡宇曰敬一箴亭曰祠曰泮曰青雲諸坊塗墁締構翼如  
將如舉如其法立橋門而睇顧之維螽與荆龍虎分峙而正面  
則屏山疊出以爲之案遠而嵐峯雲岑望之隱隱其背則玉峽  
之支山也淮水交合會流潏漩宛若襟帶包絡焉者旣落止甯

懷遠縣志

卷三

學校志

四

諗於眾曰維四代之學見於諸經先王崇之以立君道以聯師  
儒以先禮義以出教化焉侯體先王遺意整飭而弈新之豈惟  
飾美乎宮牆哉爲之士者其亦思所以自修其學也其必審幾  
以慎動立理欲之防乎果確以運斤剔口口之蠹乎時敏以居  
業孫精一之志乎介石以示守礪浮靡之類乎濬性源之真以  
開內心之泮乎謹威儀之著以秩孚德之隅乎明善以入之正  
趨向之路乎踐履以實之培崇德之基乎以敬一典學焉嚴不  
亭之箴乎以妙契思齊焉潛無像之神乎然後文章德業廣大  
高明以上躋乎聖賢之堂奧乃已此士之所以修其學者毋徒  
宮牆外望以貽山水之羞以重忝于前修此固侯修學之本意  
也因勒之以詔有永嘉靖二十四年春王正月之吉

碑在學

二十八年楊時秀重修儒學記畧曰懷遠學前有司亦亟修矣無何而新者敝修者壞惟志在於苟完厥工皆無實耳矣邑駱侯以平政之餘慨殿楹之摧墮齋廡墉垣之將頽乃一徹而新之於是有可久之道夫修之爲義士君子之所弗可以已也修一也所以修之者或少疏焉將盡爲前功之累實也者道之至也能實修之至而口口之風可企焉是固修之者之意也嘉靖己酉歲十一月

碑在學

四十五年楊時秀重修儒學記畧曰吾懷遠廟學前令修之數矣信陽何君立清操美政厚德澤民爰復命工仍有是役由廟而堂而門不逾月而完輪奐飾觀華美逾昔聖靈所妥賢才攸聚夫學旣修矣則凡我諸士子相率而遊歌於其中可不知所

懷遠縣志

卷三

學校志

五

以自修乎哉其入門其升堂其見宗廟之美百官之富皆修之所得也孔門之論政論學大端不越乎仁義孟軻氏以亞聖之才抗言乎齊梁列國之君仁義之道炳如也學者能盡此道是之謂善修今日之相與藏修相與講究與夫他日之進用推行

豈外是歟嘉靖乙丑三月

碑在學

萬厯四十七年署教諭陳一治重修廟學記畧曰萬厯乙卯蜀川王公來尹是邦下車之明年以聿新廟學爲已任鳩匠役聚畚鍤徹而新之者廟之櫺星門戟門左廡焉仍而新之者廟之殿及右廡焉其他丹楹藻座以潔神宇繪麟圖鯉以瑞多士尤飾所未曾有又曰修廟而不修學是有廟無學也湫隘已甚惡可不峻宏高大助多士之跳躍乎則又徹而新之先二門次大

門由內而外洞開將將楣扉棟宇巋然改觀余又爲請殿之祭器新以錫廡之祭器新以木籩豆之器皿總新以木當時蚤暮臨視督勸而率作者尹沈君也經始於丙辰二月迄十月而落成歲戊午公以卓異齶臺推轂特轉兩淮分司濩澤劉公擢令茲土循覽學宮慨然羨公之遠猷且躍然欲補公所未竟以爲門扉廟貌次第更新而垣欄弗整屏蔽弛觀於是易木柵以石垣易板樓以瓦坊凡廟坊左右葺藩塞竇靡不綜理王公有虔始之勤思而中庸雄其壯麗劉公有厚終之雅意而外閤鞏其堅完二公者其賢亦正相配矣王公諱可舉蜀之崇慶人劉公諱時達晉之人俱起家鄉進士沈君諱雲鷲浙之義烏人於時僉視役者訓導郭君祖謙東省掖縣人張君克孝廬郡無

懷遠縣志

卷三

學校志

六

爲人記成事而鐫石助役者署縣事壽州同知朱君東彥東省甯陽人訓導蔡君端臣蘇郡嘉定人胡君應魁荆楚武陵人縣丞李君鵬上谷深澤人主簿王君應祥浙省山陰人典史曹君應辰中州光山人例得備書萬曆四十七年歲次己未仲秋立碑在學

國朝順治十二年知縣傅鎮國教諭申詒芳修之康熙十一年知

縣于鴻漸訓導余潛飛又捐修

此兩修皆無碑縣志亦不載今從省志補之

康熙五十六年知縣劉鑑復修之

無碑記

嘉慶三年邑紳林中桂又

倡捐重修

知縣張瓚重修學宮記畧曰有司所牧者一縣之民所奉者朝廷之法而法所從出者聖人之道道明而君師之統一然後以

養以教治登於古此孔子之宮所以徧崇祀天下而修廢起墜爲官守之大而功令存焉也懷遠古塗山氏國渦淮合流荆塗兩峙而文廟實踞其勝縣志所載傑士偉人磊磊相望豈非宮牆數仞陰翌而默相之者有自來歟前明迄今百六十七年其間雖屢經修葺而梁棟牆垣年久傾陟始予任斯邑卽議與邑人士肆力捐修稍有端緒旋調任去而戴公元章奉檄來署維時林君中桂慨然倡之議以克集鳩工庀材章程畧定而戴公去予復來則與教諭茅公奎光周審其功緒堅明其約束至是始成其新造者曰牌樓三座曰齋房三間門房一間其起蓋者曰櫺星門曰兩廡曰學署大門二門其油漆重新者曰大成殿曰明倫堂曰仰高門又名宦鄉賢祠其舊無而新築者曰月臺

曰甬道其舊有而移正方位者曰泮池須築者曰撥岸曰鋪路自四配十哲兩廡至啓聖以下木主皆新之其學署舊址又買旁房田以益之繚以圍墻延長堅厚木之價一千貫又二十四千零磚瓦石五百六十貫零石灰鐵器二百六十七貫零攻木之工丹漆之工設色之工圻墁之工共八百貫又二十五千零其餘力作食用犒賞器具及買房雜費凡十三事總五百貫又四千零共用三千一百五十貫而工訖於是規制恢宏爲前此之所未有蓋起於丙辰之春戴公樂觀其始訖于戊午之夏予樂觀其成而紳士之不惜財力以爲予兩人助誠可謂有志竟成者也嘉慶三年歲次戊午仲冬立

碑在學

其地基東至魁星樓西至城隍廟巷南至澗北至鄭孫等家民房

周圍約二里許

牌樓三座左右下馬牌各一 中曰泮宮坊左曰德配天地右曰道冠古今東西寬六丈前爲月臺廣二丈二尺 國朝嘉慶三年知縣張瓚邑紳林中桂等改建

櫺星門 東西寬三丈三尺至牌樓十五丈 國朝順治十二年修原列三門康熙五十六年知縣劉鑑改爲一門嘉慶五年重修仍建三門

泮池 在櫺星門內周九丈深一丈二尺上建橋長一丈三尺寬八尺明嘉靖十九年縣丞方鐸始鑿之 國朝順治十二年濬旋淺隘不能貯水康熙五十七年貢生楊大勳又開濬建橋嘉慶五年又修

懷遠縣志

卷三

學校志

八

明嘉靖年泮池碑記畧曰懷遠學舊制猶隘以次屢闢之稍紓擴科目亦視舊有加焉蒲坂楊豸御巡蒞於茲益購地以開廣出道樹扁勒石始嚴正可觀顧其中未有泮池典則猶闕棘門前有隙地中有井淵澄可汲嘉靖丁酉浙東方梅園先生副治茲邑卽隙地鑿爲半圭浚之丈餘甃石厓四周存舊井於中起欄而橋渡之工忘勞而民無費戊子冬落成偕諸生臨觀涵山光漾水秀於嚴正者愈見區別於紓擴者愈見昭迴升而爲雲爲雨降而爲澤爲川自新厥德膏澤溥施是地理人材氣數相致而成諸士子之所當因時麗澤以求濟天下者也是爲記嘉靖辛丑歲仲春懷遠教諭華陰杜鳳鳴撰

戟門 亦曰仰高門

在泮池橋內門三間左右列修學各碑記 國朝康

熙五十六年知縣劉鑑重修

大成殿 殿屋五間明知縣徐玠因舊佛殿增修以後時加修葺  
詳各碑記

兩廡 各五間康熙五十七年邑監生楊大勳捐修 國朝嘉慶  
三年知縣張瓚重修

月臺 在殿前嘉慶三年知縣張瓚築

掖門 在大成殿右一間

崇聖祠 在大成殿後三間舊稱啟聖祠明嘉靖九年知縣任俊  
建萬曆乙巳知縣王存敬重建 國朝康熙四十四年知縣沈應  
銓又修雍正元年九月詔改啟聖祠爲崇聖祠

明倫堂 在大成殿東五間明正德七年知縣李豫建 國朝康

懷遠縣志

卷三

學校志

九

熙五十六年廩生宋起元重修

按舊志敬一亭在明倫堂東南內有石碑刻明世宗敬一錄及  
程子四箴今廢

尊經閣 在明倫堂後三間上奉文昌神內貯書籍及祭器明萬  
曆三十三年知縣王存敬所置明末兵燹廢失 國朝順治年署  
縣楊勳倡修康熙五十二年知縣錢鑑繼之舉人李佺董其成其  
制較前完固

康熙中重修尊經閣記畧曰明正德七年邑侯徐公建閣於明  
倫堂之後以爲尊經之所且奉文昌像于其上自萬曆重修以  
後歷有年所日就傾頽壬辰夏臨淮楊公攝篆懷邑捐俸金出  
募疏方卜日興工適邑侯錢公膺簡命至公以此事白之錢公

亦欣然任爲已事招匠作捐俸緩糾募金循舊志復其規模而  
敞豁丹黝之並帝像爲之一新經始于壬辰九月之十二日竣  
工於十二月之廿日其倡之者楊公也成之者錢公也董率之  
者教諭蕭公司訓朱公也謹出納清計簿者孝廉李佺也奔走  
効力辦治物料者生員楊翼善魏景隆劉佩張葆智周世隆也  
書丹刻石以紀成功者謝于彤也其監工供饌各出貲財者並  
名列于左以爲後來者勸康熙五十一年歲次壬辰舉人李滋  
霖撰

儀門 在明倫堂前三間東西角門二康熙五十七年知縣劉鑑  
建

大門在明倫堂儀門外正德七年李豫建路由德配天地坊 國

懷遠縣志

卷三

學校志

十

朝康熙五十六年知縣劉鑑與邑中紳士議移於坊左建之出入  
稱便嘉慶三年又修

雲路學宮前甬道也南北十六丈舊時民居阻塞 國朝康熙五

十六年知縣劉鑑倡議庠生宋暄廩生宋起元置買居民苗趙房

三間庠生金國華捐地以通之

按舊縣志學宮前舊有金榜聯輝玉帶環碧二坊後改曰育材  
坊成賢坊俱久廢

照牆 在雲路南寬六丈九尺

魁星閣 在照牆東雍正元年知縣唐暄建監生楊大勳捐修乾  
隆丙午燬於火生員宮檀重建

乾隆年重修魁星閣記畧曰懷遠奎星閣在巒門外雍正元年

倡議於縣主唐公暄監生楊大勳始捐資建創丙午正月炬爲  
煨燼其邑之人文磅礴鬱積而神示以煥發之幾歟其翌日余  
集諸同志商之宮生樂園慨然以身任鳩工飭材權輿於四月  
一日越二十日告成仍其故址而高其閭竦其角峩峩然規模  
迥異於曩者將神之精光作作亦倍有殊乎爲之記以爲邑之  
多士賀乾隆五十一年孟夏揀選知縣署理鳳陽府懷遠縣學  
教諭事張軸記

六角亭

在照牆西

亭與雲路照牆及亭右礮岸嘉慶六年十月  
同時修建知縣沙琛捐銀二百兩邑紳林中  
桂捐銀一千一百兩劉天言等合捐  
銀三百五十兩錢一百四十二千

土地祠 在明倫堂下路左

釋奠之禮

懷遠縣志

卷三

學校志

十一

大清會典直省府州縣歲以春秋仲月上丁祭

先師於類宮正官將事佐貳分獻監禮以師儒贊引執事以生員  
中和韶樂羽籥之舞及牲登鉶簋簠籩豆尊爵之數將事之儀均  
如太學丁祭之禮先師孔子正位南嚮四配復聖顏子述聖子思  
子東位西嚮宗聖曾子亞聖孟子西位東嚮東序先賢閔子損冉  
子雍端木子賜仲子由卜子商有子若西序先賢冉子耕宰子予  
冉子求言子偃顓孫子師朱子熹位均東西嚮東廡先賢蘧瑗澹  
臺滅明原憲南宮适商瞿漆雕開司馬耕梁鱣冉孺伯虔冉季漆  
雕徒父漆雕哆公西赤任不齊公良孺公肩定鄒單罕父黑榮旂  
左人郢鄭國原亢廉潔叔仲會公西輿如邽巽陳亢琴張步叔乘  
秦非顏噲顏何縣亶樂正克萬章周敦頤程顥邵雍位西嚮西廡

先賢林放宓不齊公冶長公皙哀高柴樊須商澤巫馬施顏辛曹  
邴公孫龍秦商顏高壤駟赤石作蜀公夏首后處奚容蒧顏祖句  
井彊秦祖縣成公祖句茲燕伋樂欬狄黑孔忠公西蒧顏之僕施  
之常申枏左邱明秦冉牧皮公都子公孫丑張載程頤位東嚮東  
廡先儒公羊高伏勝董仲舒后蒼杜子春諸葛亮王通范仲淹歐  
陽修楊時羅從彥李侗呂祖謙蔡沈陳淳魏了翁王柏趙復許謙  
吳澄胡居仁王守仁羅欽順西廡先儒穀梁赤高堂生孔安國毛  
萇鄭康成范甯韓愈胡瑗司馬光尹焯胡安國張栻陸九淵黃幹  
真德秀何基陳澔金履祥許衡薛瑄陳獻章蔡清陸隴其位均東  
西嚮

崇聖祠中設

懷遠縣志

卷三

學校志

十一

肇聖王木金父左

裕聖王祈父右

詒聖王防叔左次

昌聖王伯夏右次

啟聖王叔梁紇位皆南嚮祠內配嚮先賢顏無繇孔鯉東位西嚮  
曾點孟孫氏西位東嚮兩廡從祀先儒東廡周輔成程珦蔡元定  
西廡張迪朱松年位均東西嚮

先師位前帛一牛一羊一豕一登一鉶二簋簋各二籩豆各十尊  
一爵三鑪一鐙二四配各帛一羊一豕一鉶二簋簋各二籩豆各  
八爵三鑪一鐙二東西各尊一十二哲各帛一鉶一簋簋各一籩  
豆各四爵三東西各羊一豕一尊一鑪一鐙二兩廡二位共一案

每位爵一每案簠簋各一籩豆各四東西各羊三豕三尊三統設香案二每案帛一爵三鑪一鐙二牲載於俎帛正位四配異篚十二哲東西共篚尊實酒疏布幕勺具

崇聖祠正位前各帛一羊一豕一鉶二簠簋各二籩豆各八爵三尊一鑪一鐙二四配各帛一簠簋各一籩豆各四爵三東西各羊一豕一尊一鑪一鐙二兩廡東二案西一案均簠簋各一籩豆各四每位爵一東西各帛一羊一豕一尊一鉶一鐙二俎篚幕勺具

先期一月選牛一羊二十二豕二十二察肥瘠瞻辨毛色色向黑雍正三年定用烏牛入滌三旬前三日繕祝版分職事乃戒誓設戒誓牌於

明倫堂南向祭官率各官公服詣堂前鳴贊唱跪叩興各官行一跪三叩禮唱讀戒詞鳴鐘鼓戒誓生捧戒牌西向讀曰欽遵令典

懷遠縣志

卷三

學校志

十三

於某年月日上丁祇行釋奠禮於

至聖先師孔子官員執事人等自今日爲始沐浴更衣散齋一日各宿別室不飲酒不茹葷不弔喪不問疾不聽音樂不理刑名致齋一日同宿齋所精白乃心益加敬謹戒之哉讀畢捧牌安原處唱讀誓詞戒誓生捧誓牌西向讀曰國有常憲明神鑒焉讀畢捧牌安原處唱懸戒牌戒誓生捧牌懸鬯門外唱給齋牌凡與祭各官諸生領齋牌訖唱設誓牌戒誓生捧牌置案舁起引導樂作鳴鐘鼓設誓牌于戟門外乃肆儀樂舞生演樂執事生習禮教官監視于明倫堂會典禮部則例祭之前一日有司飭廟戶潔掃殿廡內外視宰官公服詣神廚視宰正獻官率各官及執事生入學習儀教官率樂舞生入學習舞習吹樂用六佾祭日五鼓陳牲帛盥

盛省視如儀正獻分獻官入廟將事行禮儀節均與太學遣官釋奠同 太學釋奠之禮祭日陳福胙於殿內東案尊爵之旁加爵一設洗於階下之東禮部堂官省盥如儀承祭官拜位讀祝受福胙拜位在殿中門檻內分獻官在甬道左右陪祭官在廟廷左右均北面司香司帛司爵在大成殿正位配位前捧福胙國子生二人立於東案之東西面接福胙國子生二人立於西案之西東面雞初鳴承祭官分獻官豫集於持敬門內致齋所太常寺贊禮郎十有四員竣於持敬門內均朝服昧爽贊禮郎二員引承祭官自左側門入又四員分引兩序分獻官又八員分引兩廡分獻官隨入至階東盥手畢詣拜位前立鴻臚寺官引陪祀官咸詣拜位序立典儀贊樂舞生就位執事官各司其事文舞六佾進贊禮郎贊

就位引承祭官分獻官就位立典儀贊迎

神唱樂官唱迎

神樂奏昭平之章樂作郎贊禮贊就上香位引承祭官升階入殿

左門贊詣

先師香案前跪承祭官跪俯伏贊上香司香跪捧香承祭官三上香畢俯伏興以次詣四配位前跪上香儀同贊復位引承祭官復位初迎

神時贊禮郎分引東西序分獻官各一員升東西階大殿左右門詣十二哲位前跪上香退復位引兩廡分獻官東西各二員分詣先賢先儒位前跪上香均如前儀贊禮郎贊跪叩興承祭官分獻官暨陪祝官行三跪九叩禮興樂止典儀贊奠帛爵行初獻禮奏

宣平之章樂作舞羽籥之舞贊禮郎引承祭官升階贊詣  
先師位前跪承祭官跪俯伏司帛跪捧篚承祭官受篚拱舉奠於  
案興司爵跪捧爵承祭官受爵拱舉奠於墊中俯伏興贊禮郎贊  
就讀祝位引承祭官至殿中拜位立贊跪承祭官分獻官暨陪祀  
官皆跪贊讀祝司祝跪讀祝如儀承祭官分獻官暨陪祀官均行  
三叩禮興贊禮郎引承祭官以次詣四配位前跪奠帛獻爵儀同  
復位贊禮郎分引兩序分獻官升東西階入殿左右門詣十二哲  
位前跪俯伏奠帛獻爵俯伏興復位均如儀引兩廡分獻官分詣  
先賢先儒位前奠帛獻爵儀同樂止亞獻奏秩平之章樂作贊禮  
郎引承祭官升階贊詣

先師暨四配位前奠爵於左如初兩序兩廡分獻畢均復位樂止

終獻奏敘平之章樂作贊禮郎引承祭官升階奠爵於右如亞獻  
儀兩序兩廡隨分獻畢均復位樂止文舞退典儀贊飲福受胙贊  
禮郎贊詣受福胙位引承祭官至殿中拜位立捧福胙二人自東  
案捧福胙至

先師位前拱舉退立於承祭官之右接福胙二人自西案進立於  
左贊禮郎贊跪承祭官跪贊飲福酒右一人跪遞福酒承祭官受  
爵拱舉授於左興次受胙如飲福之儀贊叩興承祭官三叩興贊  
復位引承祭官復位贊跪叩興承祭官分獻官既陪祀官均行三  
跪九叩禮興典儀贊徹饌奏懿平之章樂作徹饌畢樂止贊送  
神奏德平之章樂作贊禮郎贊跪叩興承祭官分獻官暨陪祀官  
行三跪九叩禮興樂止典儀贊捧祝帛饌送燎有司各捧祝帛香

饌恭送燎所如儀承祭官避立拜位西旁俟過復位樂作贊禮郎引承祭官詣燎所視燎畢仍引由左側門出樂止陪祀各官皆退謹按則例不隸省會之府州縣長官正獻兩序以其貳及所屬兩廡以食餼學弟子員各一人分獻則邑之兩序分獻當以主簿典史其省盞當以食餼弟子員

同時致祭崇聖祠教諭正獻兩序訓導分獻兩廡皆食餼學弟子各一人分獻行禮儀節承祭官拜位在階下分獻官拜位在承祭官後讀祝拜位在殿中門檻內均北面不用樂舞凡上香迎神奠帛奠爵讀祝徹饌送神視燎行禮均如致祭 先師儀  
謹按邑止教諭一員訓導一員不敷分獻亦當以食餼弟子員充

釋菜上香之禮

大清會典凡直省府州縣月朔釋菜望日上香以教授教諭訓導等官分班行禮與太學同 太學釋菜之禮朔日夙興潔掃內外展神幄拂拭神案陳棗栗各一豆鑪一鐙二設案一於殿內之東陳香盤七尊一每位爵一又設案於東西兩廡之南各陳香盤三尊一每位爵一無帛筐尊實酒窵勺具司香司爵立於案旁設洗於階下之東通贊二人立於殿內東西楹又二人立於殿外東西階上皆公服質明祭酒朝服諸生吉服由大成東側門入及廟庭各就位行三跪九叩禮祭酒詣東階盥升東階入殿左門詣神位前跪三上香詣尊案前視注酒復詣神位前跪獻爵興以次詣四配位前皆如之分獻者詣兩序兩廡如其儀降復位行三跪九叩

禮  上香之禮拂拭神案然鐙設香盤於殿內及兩廡各案司香各一人立於案前設洗於階東質明各官就位如釋菜儀司業盥升東階入殿左門詣神位前跪三上香以次詣四配位如之分詣兩序兩廡皆如之降復位行三跪九叩禮

謁廟之禮如上香  按唐時鄉貢宋時貢舉人皆謁  先師明新舉人更衣謁學然後赴鹿鳴宴官員蒞任三日謁學行香諸生講書任滿陞遷辭廟然後解任其新生謁學亦始於明

誕辰  雍正五年制八月二十七日恭遇

先師誕辰王公百官致齋一日各衙門不理刑名民間禁止屠宰學額

督學者歲科兩試懷遠縣文章額取十六人入縣學爲附生武童

懷遠縣志

卷三

學校志

十七

歲試額取九人爲武生縣學附生無定額增廣生二十人廩膳生二十人歲貢生兩年一人以年深廩膳生充拔貢生十二年一人恩貢生遇恩貢充以其次廩爲歲貢

卧碑  順治九年頒刻學宮

朝廷建立學校選舉生員免其丁糧厚以廩膳設學院學道學官以教之各衙門官以禮相待全要養成賢才以供朝廷之用諸生皆當上報國恩下立人品所有教條開列於後

一生員之家父母賢智者子當受教父母愚魯或有非爲者子旣讀書明理當再三懇告使父母不陷於死亡

一生員立志當爲忠臣清官書記所載忠清事蹟務須互相講究凡利國愛民之事更宜留心

一生員居心忠厚正直讀書方可實用出仕必作良吏若心術邪刻讀書必無成就爲官必取禍患行害人之事往往自殺其身宜當思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司衙門不可輕入卽有切己之事止許家人代告不許干與他人詞訟他人亦不許牽連生員作証

一爲學當尊敬先生若講說皆須誠心聽受如有未明從容再問毋妄行辨難爲師者亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

懷遠縣志

卷三

學校志

十八

一生員不許糾黨多人立盟結社把持官府武斷鄉曲所作文字不許妄行刊刻違者提調官治罪

藏貯書籍

御纂周易折中二十二卷

御纂周易述義十卷

欽定書經傳說彙纂二十四卷

欽定詩經傳說彙纂二十卷序二卷

御纂詩義折中二十卷

欽定春秋傳說彙纂三十八卷

御纂春秋直解十六卷

欽定周官義疏四十八卷

欽定儀禮義疏四十八卷

欽定禮記義疏八十二卷

御纂日講四書解義二十六卷

御纂性理精義十二卷

御製日知薈說四卷

御纂朱子全書六十六卷

御定通鑑綱目三編四十卷

欽定明史三百六十卷

御選唐宋詩醇四十七卷

欽定四書文四十一卷

御製樂善堂全集定本三十卷

懷遠縣志

卷三

學校志

十九

御製文初集三十卷

御製詩集四十四卷二集九十四卷三集一百卷

御製文廟碑文一篋

御製平定兩金川碑一篋

南巡盛典一百二十卷

周易正義十卷 尚書正義二十卷 毛詩正義禮四十卷 周

禮註疏四十二卷 儀禮註疏十七卷 禮記正義六十三卷

春秋左傳正義三十六卷 春秋公羊傳註疏二十八卷 春秋

穀梁傳註疏二十卷 孝經正義三卷 論語正義二十卷 孟

子正義十四卷 爾雅註疏十卷 史記正義一百三十卷 漢

書一百二十卷 後漢書一百二十卷 三國志六十五卷 晉

書一百三十卷 宋書一百卷 南齊書五十九卷 梁書五十卷 陳書三十六卷 魏書一百十四卷 北齊書五十卷 周書五十卷 隋書八十五卷 南史八十卷 北史一百卷 新唐書二百五十五卷 新五代史七十五卷 宋史四百九十六卷 遼史一百十六卷 金史一百三十五卷 元史二百十卷 資治通鑑二百九十四卷 直齋書錄解題二十二卷 教諭署 在尊經閣後 訓導署 一在舊敬一亭北康熙五十六年訓導朱簠捐蓋內宅三間今署是也 一在啟聖祠西因奉裁訓導一員此宅遂廢俱併爲教諭署

玉帶河 引碧溪之水經宮墻前東入淮明隆慶四年知縣王之

懷遠縣志

卷三

學校志

二十一

佐所開也

雲龍岡 在學宮後爲學宮基地來脉舊名黄土岡明萬曆庚子邑紳孫秉陽楊應聘始議培護因易此各 國朝康熙中知縣錢鑑又培補之嘉慶十四年邑紳士孫素楊士緯又捐資培補建亭其上

明萬曆中培補雲龍岡記畧曰雲龍岡卽鳳池門外之黄土岡也爲儒學祖山脉自荆山來可三里許至卞和洞下頓伏而東山之石者土矣龍之粗者細矣伏而突起爲是岡豐圓端秀居然金星位于兌也自是起伏餘百步稍入於良又數百步轉而巽向是爲儒學學故梵宇也塗山聳翠淮水拖藍青龍碧溪環左右而合流於前以入淮得地利焉先是正德七年督學使者

黃公如金按懷登覽見其山河映帶之美龍脉萃聚之完爰易梵宇爲今學嗣後科第輩出人文益彬彬矣久之居民取土日劓月削虧損過半地主李 等請於府縣榜諭嚴禁莫克止也有識者深爲儒學風氣慮庠友吳生柟往往爲余言余因謀諸光祿卿楚璞楊公期於培補維時留司斷事毛君鳳彩適署邑篆首捐俸資十金鄉士夫商民慕義而助甫旬日得百金錢穀如千數廼屬吳生柟李文衢輩督同鑿土張大仁董其役經營量度殫厥心力限地以程工計工以酬值趨赴者日雲集焉始事於萬厯戊戌之秋兩越月而告竣岡之豐圓峻秀者復故遂更名曰雲龍岡夫龍神物也隱而未見晦鱗韜甲斂神功於寂莫會風雲騰霄漢霖霖雨澤羣生功施何溥哉則以素所養於潛者豫也竊願多士以

懷遠縣志

卷二

學校志

一一一

人龍自奮毋徒甘爲池中物也若夫世守是岡俾勿至於再壞者深於李生有責焉蓋岡地爲李祖業且其處葬有先世墓云萬厯庚子仲春吉旦邑人孫秉陽撰

國朝嘉慶年重培雲龍岡記畧曰懷邑儒學前明正德七年遷移茲所是岡爲少祖山迨萬厯間居民取土致傷龍脉時有節憲孫公秉陽大司馬楊公應聘培補圓滿碑茲在焉迨 國朝康熙間邑宰錢公諱鑑捐俸重培又爲完整至乾隆丁酉岡之東日劓月削廣袤數丈致成坑坎維時邑中科甲甚爲寥寥於是太史孫公素生員楊君士緯念文運之攸關思先志之當繼偕邑中好義之士捐資重培不踰月而功竣更於岡頂起建六角亭以矗秀氣名曰凌霄亭不數年而科第踵接嘉慶戊午亭稍殘壞岡東南隅又

漸有竊土者因憚爲修葺度於東北角蓋草房三間招人看守令其週圍廣栽石榴樹間以雜樹使無隙地則取土者不禁自止又因山角出脉之處微有所傷砌石岸以保護之庶幾一勞永逸可無再傷之患矣工竣而碑未立適予承乏於此請予記其顛末查岡東有李氏墓所以能得至今無恙者總因此岡爲儒學祖山賴疊次培補之力其故塚外並無多墳是向來不許混葬可知再詢諸鄉耆歷來爲護學官地故無銀糧至邑紳士不惜貲財遍栽樹木本與李氏無干其所獲果木小利着爲修理並看守之資以公濟公實爲萬全垂久之良策而李氏墓亦得相依於不敝已懷遠縣知縣郭翰屏撰嘉慶十四年仲夏立

文筆塔 在小塗山顛明萬曆中義民何極建年久頽壞乾隆中

懷遠縣志

卷二

學校志

一三一

廩生楊廷瑶復建後又傾頽乾隆五十六年廷瑶之子如蘭倡捐修復

乾隆年重修文筆峯碑記畧曰學宮脫脉於荆麓自雲龍岡迤邐盤折而下碧溪玉帶環其左右遙望塗峯積翠淮水拖藍誠勝境也然以山勢蜿蜒未能矗立揆諸五行金水土之形居多而木火不足明萬曆年義民何極精青烏術爰于小塗山巔特立一峯以補其缺號曰文筆載諸志乘合邑文風所關昔年人文之盛以此後久傾圮而登科第者遂罕邑廩生楊君廷瑶倡義復建嗣是廿餘年間掇巍科者接踵邇年來霖雨漫漶石泐壤圯忽焉其頽楊君令嗣如蘭新蘭承先志與邑紳魏君維烈維琪楊君步超士緯元亮何君士泰方君貫一謀所以復建互

相贊成遠近好義者爭響應焉邑侯周公復爲由諭以興徒役  
楊子兄弟躬督其事鳩羣材庀眾工仍舊趾築而增之虛其中  
以應離象層列七級洞開朱門經始於辛亥之孟夏越三月告  
竣計峰高六丈有奇侵雲逼漢控引荆塗巍巍乎與學宮輝暎  
洵足以補天工稱巨筆矣予聞通三才之謂儒故相陰陽卜瀝  
澗地理之說聖賢不廢矧學宮重地人才風化之所從出而培  
補形勝可勿務歟且天事之待補於人者何限卽人事之待補  
於斯文之筆者又何限從此五形之秀蔚起人文輔翼鴻猷昌  
明經術必有揜巨筆者出而應之而豈徒區區焉工文藻掇科  
第已耶諸君子其踴躍濯磨以奮興於學必無負建峯意也懷  
遠縣儒學教諭截取知縣張軸撰邑庠生楊士緯書丹乾隆五

懷遠縣志

卷三

學校志

一三三

十六年仲秋穀旦立

名宦祠在戟門左祀漢當塗長荀淑元縣尹梁瑞明知縣楊鏞林  
大槐徐玠教諭王軾知縣任俊秋逢慶何立王存敬高達 國朝  
潘登貴

按康熙鳳陽府志懷遠名宦祠祀漢荀淑王渙元廉松壽海牙  
梁瑞明楊鏞任俊秋逢慶何立林大槐經恒劉功允王存敬張  
中蘊陳邦翰莊祖誼王軾王景程昭高達 國朝潘登貴較縣  
祠多九人又縣祠有徐玠而府志無之其所志亦頗錯襍王渙  
爲考城令漢之考城在今河南以縣有考城鎮而誤入舊縣志  
辨而去之是也其餘去取殊不可解姑仍其舊不敢更張 又  
舊縣志不載何立潘登貴今據祠位補入

鄉賢祠在戟門右康熙五十七年監生楊大成重修祀漢桓榮宋知軍洪福明副都御史周銓監察御史魏貞叅政楊鏞郎中姚鳳知縣徐疏知縣許綱教諭楊寶孝子許本忠教授江阡教諭梅効知府楊嘉猷知縣周希賜 國朝知縣李佺

按康熙鳳陽府志懷遠鄉賢祠祀漢桓榮桓郁桓焉桓典晉桓彝桓冲宋洪福元蕭洵馬希先姜起宗明常遇春花雲朱能朱勇常榮常維德常德勝李遠柳升周銓年富楊鏞段苒魏貞張俊湯友恭姚鳳楊時秀孫秉陽楊應聘周汝昌周希賜許綱徐琉江阡袁槍 皇清楊嘉猷周希賜此志與縣祠叅錯而府志之紕繆更有不可解者楊嘉猷周希賜俱前明人而入之本朝周希賜又重出不知其何所據以書之也舊縣志不載洪

懷遠縣志

卷二

學校志

一四

福許綱梅効李佺今據祠位補之

忠義祠在明倫堂後祀明常遇春花雲朱能朱勇常維德常德勝常榮李遠柳升崔聚孝子元高中馬希先明韋儒張賢耿約袁體許士俊王殿閔魁魏班 國朝張啟仲巨彤斌巨彤弼

按舊志不載忠義祠殊爲漏畧而人物傳所載亦無魏班無可考補 此祠兼祠孝子祠額當云忠孝

貞烈祠 在縣西誠求門外康熙三十三年三衛頭人捐地知縣沈應銓修建五十七年知縣劉鑑重修立主奉祀共貞烈十人舉人李佺監修祀漢劉節婦桓氏明袁節婦楊氏周節婦陳氏薛節婦朱氏劉節婦許氏節婦沈節婦許氏薛節婦吳氏富節婦楊氏許節婦顧氏花烈婦郜氏花節婦孫氏薛節婦徐氏曹節婦陳氏

吳節婦何氏閔節婦高氏周節婦黃氏王節婦楊氏李節婦張氏  
許節婦蔣氏張烈婦徐氏杜烈婦趙氏年烈婦胡氏許節婦金氏  
何節婦袁氏何節婦許氏李烈婦石氏李節婦陳氏劉節婦許氏  
孫節婦朱氏姚烈婦賈氏趙節婦徐氏梅節婦房氏何節婦袁氏  
陸節婦宮氏王烈婦孔氏李烈婦徐氏王節婦范氏周烈婦薛氏  
陶貞女陸貞女姚貞女淑芳陳烈婦殷氏李烈婦段氏張烈女袁  
貞女王節婦蔡氏國朝孫烈婦羅氏王節婦蔡氏孫烈婦張氏張  
烈婦王氏支烈婦湯氏陳烈婦何氏曹烈婦甘氏陳節婦趙氏高  
烈女周氏程節婦湯氏胡節婦程氏張節婦周氏江貞女黃烈婦  
楊氏潘節婦周氏石節婦陳氏方列婦成氏邵節婦張氏張貞女  
王氏王節婦王氏孫烈婦周氏邵節婦熊氏宮節婦方氏崔節婦

楊氏蔣節婦顧氏石節婦朱氏張烈婦余氏孫節婦楊氏王節婦  
宋氏江節婦傅氏王節婦宮氏方節婦王氏 乾隆五十九年祠  
字傾圮知縣張瓚率邑人劉大誠等重修

按節烈貞孝婦女自明以來凡數百人而所祀僅七十八人甚  
爲疎漏當依列女傳參酌補祀

大清會典直省府州縣附廟左右各建忠孝節孝名宦鄉賢四祠  
歲春秋釋奠禮畢教諭一人公服詣祠致祭是日清晨廟戶啟祠  
門拂拭神案執事者陳羊一豕一籩四豆四鑪一鐙二陳祝文於  
案左陳壺一爵三帛一香盤一於案右引贊二人引主祭官入詣  
案前北面立禮生自右奉香盤主祭官三上香訖引贊贊跪叩興  
主祭官三叩興禮生自右授帛主祭官受帛拱舉仍授禮生獻於

案上禮生酌酒實爵自右跪授爵主祭官受爵拱舉仍授禮生興獻於正中讀祝者奉祝文跪案左引贊贊跪主祭官跪讀祝畢以祝文復於案退主祭官俯伏興執事者酌酒獻於左又酌酒獻於右退引贊贊跪叩興主祭官三叩興執事者以祝帛送燎引贊引主祭官出執事者退

孫讓增祀鄉賢劄曰吾邑在漢時龍亢桓氏以經術代爲帝師嗣是各賢繼起以迄於晉今春卿太傅入祀鄉賢洵此邦人倫冠冕也考後漢書及晉書所載春卿子孫如仲恩之篤學叔元之經行公雅之疆正始春之高操文林之志介彥林之通潔彥倫之致身幼子之公忠皆卓然一代名臣可爲萬世師表今祠登春卿而諸人者皆闕焉將以一姓之賢難于盡褒乎抑向時

議祀者之漏也夫名賢所居地以之重多則益美豈宜自限且自宋元以來鄉賢之有位于祠者求如仲恩諸人恐亦尠其匹矣罕見則推遷充數鬱盛則畧取見遺其何以敬恭桑梓作興後進爲之模範哉又如蕭洵馬希先姜起宗孫秉陽楊時秀楊應聘等並德行孚于鄉里著於志乘似尙有漏畧宜參酌補祀年恭定雖有耑祀亦宜並入以光祀典今與賢士大夫薦紳耆老等議補祠位其各悉心以稽條其當否邑原任訓導林中杭現任教諭閔長育孝廉方正宮榛貢生方慄楊廷璣生員許所望湯若荀楊士緯方祝三等議曰邑中鄉賢之祠相沿歷久仍其舊有莫爲考正甚者神位缺失次第顛倒今賢侯釐秩祀崇昔賢以興作人之化誼甚美中杭等謹按 國朝康熙中所修



戀不移遂同生等酌議寫立前任郭名下以杜糾纏長齡物故又未經稟明恐年深湮沒伏乞存案計呈文契一紙如稟存案

張容卓捐當房四間

亦楊步堦業當價錢四十千并繳存公

又買楊自安宅地一區

東至街西至楊南至劉北至楊東口七弓一尺西口五弓二尺南口十五弓北口十五弓價錢八十千

改建書院十

五年七月落成大門三間東向門左右耳房各三間西向左角門

一間東向二門左右學舍各三間西向講堂五間東向兩廂學舍

左右各六間南北向後堂三間東向左右廂各三間南北向凡三

十六間監生田忠監造凡用錢三千七百十四千零

內田忠捐錢一千千

又

除置買房價及各正用存錢一千九百零一千發典商吉長泰方

安義孫義和存典生息以為延請山長修金各卷存案

十八年四月楊士緯

何垣呈稱前有何垣墊發房價捐錢十五千李謙順墊用商辦樂輸筵席費捐錢十八千未經列入榜示並聲明李長齡倡首捐房

一節知縣郭批候勒石時附入

其生童住院膏火之需尚未計違及也二十一年

懷遠縣志

卷二

學校志

武進李君兆洛來為主講署其門曰真儒書院知縣孫讓為文泐

石以記之而署講堂曰席珍後堂則前主講六安關君元輝署曰

敷經書室其左右廂亦學齋也舊以居僕隸為庖湏正室三楹皆

東向炎夏無以禦署二十二年讓于敷經書室之右增建齋室二

間南嚮左廂之後增庖室二間重葺左廂三間額曰逸我齋院故

楊處士尚渾居齋額亦楊舊署也葺屋後其裔孫奉以貽焉重葺

右廂三間南北啟牖西墉闢戶以達南嚮之齋李君題之曰如是

住屋後隙地植若榴百本屋右地最窪下因而浚為池環紆數十

步輦荆山石半繚之圍溷亦具凡增建屋五間重修屋六間用錢

百一 千零其貲則以修志經費之餘充焉自是內外齋舍

頗完整可居而生徒膏火之資則尚有待于邑之能者共成之也

真儒書院記曰懷遠舊有書院在荆山之麓其圯已久莫之葺也嘉慶十三年前縣令郭君翰屏與邑紳士買官署東北楊氏故宅庀而新之門廊堂室皆具讓受邑事延友人前庶常李君兆落爲主講而李君始爲之署其榜曰真儒蓋取後漢書桓榮傳語也桓氏邑之龍亢人以治歐陽尚書傳侍講禁中子孫代爲帝師弈世各德與東京相終始今邑人士猶能砥礪文學取科名致貴顯甲於旁邑非其遺澤歟夫教育之法昉於虞書其所以爲教四言而已曰直曰寬曰剛曰簡直則無邪寬則有容剛則寡欲簡則致一天下固未有挾迂迴詭僻之意見小欲速淺嘗輒止柔曼委隨逐世俗爲憧擾而可以成學者也然則褒衣博帶之士往來誦習於斯者可以知所法矣能純其心如彥

林之仕不苟祿辭隆從窳乎能平其矜如春卿之蘊藉相馱不以辭長勝人乎能厲其氣如文林之一餐不受於人乎能專其志如仲思之白首好禮乎夫而後以禮樂蒸以風雅潤以文詞斯其于儒也庶幾矣韓氏詩外傳曰儒之言需也千舉萬變其道不窮無立錐之地而明察足以持天下巖居穴處而王侯不能與爭名此之謂也若徒以車馬衣服之賜誇稽古之榮而相歆以爲學之利則猶非李君各院之意也夫嘉慶二十一年十月知縣孫讓記

各紳民樂輸姓名銀數清冊前知縣事郭翰屏欲勒石未果而去今爲附刻於碑陰俾有可考

除書院經費有存典生息之舉外紳士宮唐林孫四姓共捐元

銀八百兩請存典商生息以備邑中鄉會試盤費之用紳士楊姓捐文銀三百兩馬獻廷又捐錢二百千均請存典生息以邑諸生鄉試之用俱如所請交典商吉長泰方安義孫義和一體存典生息存案

其赴都應一切考試不得領

義學 舊志在縣治西南卽社學舊址也其地西南俱抵城隍廟明邑紳孫秉陽用銀五兩買左鄰楊柏地以益之自辦工料建瓦房三間草房一間扁曰義塾舊府志云康熙十年知縣于鴻漸修今此學久廢嘉慶十二年耆民曹在南具呈言民自幼貧寒失學壯而貿易四方竊見他處州縣其鄉黨間家產豐厚者每設訓蒙小館貧苦無力之家可以送入讀書資質美者或自此可望有成卽令無成亦藉以稍識之無粗知禮義心竊羨之民奔走一生年

懷遠縣志

卷三

學校志

三十

已八十有二薄有餘資來歲捐錢四十千請生員潘澍訓誨童蒙設館于烈女祠内蒙童以二十人爲率仍捐錢二百千文懇恩發典生息以每年修金庶幾可垂永久知縣郭翰屏允其所請給示開學所捐折實錢一百八十千文憑禮房吏當八大集徐姓地畝生息每年息錢三十二千以爲延請蒙師修脯其館仍設烈女祠內有卷存案

射圃 順治初督學李永泰檄行郡邑悉立射圃爲諸生比耦較習之所知縣傅鎮國擇舊察院廢址爲之建坊築牆以習射今廢約所 舊縣志云舊設於大聖寺或水月寺藥師庵及鄉鎮各廟會講

聖諭近奉各憲明文地方官於每月朔望率屬邑中紳民老少俱

傳集於儒學明倫堂恭迎

上諭行九叩禮畢約正震鐸如儀宣揚令諸生等登案高聲訓講數條畢或引問過罪犯及所舉善類量行賞撻焉

### 風俗

舊縣志稱前志云俗尚質樸茅茨土劔習於儉嗇而婚姻喪葬必鳩財以爲之助沉毅果敢徑情不文又云僂力農桑各有恒業飲食以時少長以齒無健訟之習號稱易治而遺乘滯穗之利惠及鰥寡有豳人之風焉婚嫁之禮多尚儉樸喪葬之儀每遵家禮但惑於風水之說停柩未葬者多歲時伏臘所用儀節大約與中州相類嗣因淮渦交通商賈輻湊五方逐末者居其地服食器用多尚奢華故人務末忘本相習于靡羣趨于惰兼之水旱頻仍中人

### 懷遠縣志

#### 卷三

學校志

三二

蕩產且乏兼歲之儲一遇災荒輒鬻子女棄故土而適他鄉者比比皆是士之讀書味道者見聞未廣多因心自用恥于相師以致言坊行表得軌于道者或是之少然士大夫能忘分下交與鄉人序齒讓通緩急後進之士多折節於前輩古風猶有存焉余至懷遠與其鄉人士遊按行里落周諏利病察其被服謠俗誠有如前志所云者大抵敦任卹矜志節有氣敢往其所長也而聞見褊狹專已而自足住往往驚於功利偷取一切無恢閎寬通之材野處者椎魯願慤畏法而親上而游手浮食之民或相誘煽爲飲博故其俗駁而不醇夫風俗之成本於教化長吏之所指導鄉先生之所表率歲時月吉之所勸勉其可無亟哉

孟春元旦雞鳴起設供養主人率子弟焚香拜天地次祀竈次拜

祖先焚楮錢壽尊長天明親朋交相賀歲立春前一日造土牛官  
吏師生迎春於東郊上元張燈弛夜禁 仲春以驚蟄日陰晴占  
一春之晴雨 季春清明插柳掃墓農家浸種下早秧 孟夏八  
日浮屠建浴佛會 仲夏五日作角黍懸艾於門飲雄黃酒繫五  
色綫於手腕云續命絲亦間有戲龍舟於兩河者始刈麥官因農  
忙放徵輸限 季夏六日曬書曬衣且以是日陰晴卜秋成之旱  
澇 孟秋中元日民祭祖先是時秋穀熟民乃穫刈 仲秋中秋  
日備禮祀月設瓜果以玩月 季秋九日作糕相遺登高飲茱萸  
酒是月豆始熟官又以農忙給假令民收穫 孟冬朔日民間祭  
墓 仲冬冬至日官司賀長至民間不甚重之 季冬二十三日  
設餼果祀竈掃舍宇除夕換桃貼春聯暮爲酒饌少長畢集拜祖

懷遠縣志

卷二

學校志

三三一

先父母謂之饒歲

舊縣志

嘉慶二十四年七月縣民劉發呈請捐地十八畝入真儒書院

地坐落馬家墳西查契載十八畝不載弓口數經董事帶同地保  
丈明東口四十八弓一尺西口三十五弓半南口七十八弓半北  
口七十九弓正東口斜盈十九弓四尺中口斜盈六十一弓一尺  
計小畝十五畝三分一釐八豪六絲圖單并契存案 以書成後  
捐入附  
記於此

生員楊蘭甲校字

補編

嘉慶二十三年知縣孫讓訓導楊瓊林與邑紳原署歙縣教諭林中杭等重修文廟大殿升高四尺奎文閣升高一丈二尺又於廟右買地鑿河以順水法

孫讓重修文廟碑曰粵若稽古有夏帝禹釐下土方旣道桐柏遂禽支祁安流湯湯登於塗山玉帛肆覲文命用光聲教宣達大宇禮順民人遂康亦越周穆登覽廣麗言臨南疆纘禹之績以順歲事望秩是常大聖所紀萬世承理茲土之美遠近修潔飭省嘉義庠序濟濟百里之封峩峩者山洋洋者水翼翼者庭巍巍者堂莫不聳跂篤生俊賢弁冕端委先後踵趾維我

皇帝體德皇極文書是同大治濯俗下舞上歌禮樂誕豐維我孔

懷遠縣志

卷三

學校志

三三三

子成性修道代天之功一范智愚開僊銷鄙以淳

皇風維我多士皆有法式血氣狗通朝益暮習敬念罔斃厥德則充維我黎庶事各有序和樂服從明本知向顯白道理端直敦忠新宮旣成經訓昌大羣生安甯驩喜俸教承順聖意咸知表經在天罔恫乃降祉福嘉保太平原本古始祇頌懿典垂光斯銘維

皇帝嘉慶二十有三年懷遠縣知縣孫讓教諭王寅訓導楊瓊林主簿屠慕曾典史王文烈邑士人前貴州候補同知署清平縣知縣林晉奎廩生宮思晉等相與議曰學宮卑隘不稱制度觀其流泉又背地防修除整治宜在今日爰會公用爰度事任乃齊乃勅下者旣高隘者旣拓形法皆得乃潔蘋藻以告於宮棖

棟以隆几筵以豐人娛神歆祇祇雍雍自建茲學五百餘禩每有興作皆刻于石以自爲紀今日之事釐改制量事類初始宜詔後人敦勉毋替請視此石以爲度軌

教諭署門房二間書房一間在尊經閣東草房一間在閣西上房五間廚房二間

訓導署正廳三間對廳三間對廳後草房三間上房三間上房旁屋三間廚屋二間其對廳三間今訓導楊瓊林重修上房旁屋三間則其所添建也